

չայ, որում եւ դրեալ էր Պօղոս Պատրիարք վասն այնր խնդրոյ, և էառ 'ի նմանէ եւս գիր առ մեծամեծս Երուսաղէմի հաստատուն պահել զվճիռն, որ տուաւ վասն դըրան Բեթղէհէմի հրամանաւ Կուսակալին Դամասկոսի :

Հակառակութիւնք Յունաց անվերջանալի էին 'ի Բեթղէհէմ, զի կամէին խափանել զպատարագն Հայոց յԱյրէն Ծննդեան Քրիստոսի և արտաքսել յեկեղեցւոյ անտի, բառնալով զկանթեղս, զպատկերս և զայլ եկեղեցական սպասս և 'ի բողոքեն Հայոց առ Դատաւորն, և 'ի ցուցանել նոցա զամենայն գրեանս վասն այնր, կոչեալ զնոսա պատուիրեաց չհակառակիլ ընդդէմ Կայսերական հրամանին և բազմաթիւ գրեանց, եւ չյարուցանել վէճս ընդ Հայոց, և 'ի հաստատութիւն բանից նորին ինքն եւս գրեաց գիր, և Հայք առաքեցին զայն աղերսագրով առ Կուսակալն Սալէհ Փաշայ, և նա գրեաց առ Դատաւորս Երուսաղէմի բառնալ զհակառակութիւնս Յունաց և լինիլ պաշտպան իրաւանցն Հայոց, որք սահմանեալ են արքունի հրովարտակաւ, լինիլ բաժանորդ եկեղեցւոյն Բեթղէհէմի եւ գերեզմանին Ս. Աստուածածնի : Ի վերայ այսորիկ լեալ Յունաց ժամանակս ինչ, դարձեալ յարուցին խռովութիւն մեծ, զի ըովանդակ եկեղեցին Բեթղէհէմի սեփհական Յունաց ասէին, եւ 'ի սաստել Դատաւորաց՝ դարձեալ լռեցին, եւ զկնի միոյ տարւոյ վերստին խռովութիւն մեծ, զի կամէին փականս դնել 'ի վերայ փայտեայ դրան եկեղեցւոյն, որ 'ի սիւնազարդ գաւթին, և զի չէին հաճեալ ընդ կարգադրութիւն նուրի Էֆէնտեայ, որ լեալ էր Արքունի հրովարտակաւ և գիտութեամբ ամենեցուն, և այսպէս օրքան զօր զայրանայր խռովութիւնն, և այն յաւէտ 'ի փոփոխիլ Դատաւորաց քաղաքին : Իսկ Հայք դարձեալ զիմեցին առ Դատաւորն, և մատուցեալ զգրեանս ամբաստան եղեն զանիրաւութենէ Յունաց, եւ 'ի հարցանել նորա ցայլազգիս, ետուն պատասխանի, թէ սիւնազարդ գաւթի եկեղեցւոյն Բեթղէհէմի բաժանորդութեամբ է երկոյ ազգաց, և Հիւսիսային կողմն յատկացեալ Հայոց, և Գերեզման Ս. Կուսին բաժանորդ 'ի մէջ Հայոց եւ Յունաց : Արդեւ Դատաւորն զՅոյնս չխափանել զճանապարհն և չվիճել վասն եկեղեցւոյն և այլոց իրաց : Եւ 'ի փոխիլ Դատաւորին դարձեալ ատե-